

Rapport annual 2017 dalla lavur da GIUVNETETGNA CADI



Igl onn 2017 ei vargaus cun bia bialas occurrenzaz e scuntradas ensemen cun giuvenils e giuvens carschi. Denton ha quei onn era purtau enqual midada ella structura e malsegirtad pigl avegnir. La vischnaunca Breil ha visau il contract dalla cunvegna da prestaziun culla fundaziun Tür auf–mo vinavon ch'ei responsabla per la lavur da giuvenetgna. Las vischnauncas Trun e Tujetsch han medemamein abdicau sin fin 2018 cun quei che la damonda da finanziar la cumpart dalla vischnaunca Breil ha preoccupau els. Duront diversas radunonzas e sesidas extraordinarias culs responsabels sco era alla conferenza da presidents dalla Cadi ein ins secunvegna da tschentar danovamein la damonda a tuttas vischnauncas pertuccadas tgei ch'ei lur basegns e giavischs enviers la lavur da giuvenetgna. El decuors digl empren miez onn dil 2018 vegn evaluau las rispostas e silsunter offeriu davart dalla fundaziun las purschidas pussevlas. Nus sperein d'anflar vinavon ina via da mantener nossa lavur pils giuvenils e giuvens carschi ella regiun.

Ils locals da giuvenetgna TALINA a Sedrun, CONS a Mustér e PISTREGN a Surrein ein mintgamai aviarts il venderdis sera per 2 tochen 3 ½ uras cun survigilonza da menaders e menadras e vegnan visitai bein. Ils scolars e las scolaras dil scalem superiur sco era giuvenils ord scola han la pussevkladad da sentupar leu per star da cumpignia, dar giugs ni far autras activitads creativas. Ils locals vegnan bugen era duvrai per sentupadas privatas, sco fiastas da natalezi eav. Per giuvenils che sengaschan tier GIUVNETETGNA CADI ei quei diever gratuit.



Ella vischnaunca da Breil eis ei gartegiau il 2017 da vegnir in pass vinavon pertuccont il giavisch dils giuvenils per haver en lur vischnaunca in local da sentupada. Ils responsabels dalla vischnaunca ein stai beinvulents ed aviarts per propostas dalla vart dils giuvenils. La gruppa d'interess e lavur dumbra entuorn

20 giuvenils engaschai e motivai. Il process ensemen culs giuvenils e GIUVNETETGNA CADI ch'era bein sin rucca ei deplorablamein vegnius interruts muort la visada dil contract. Ils 6 da december havein organisau ina sera da cumiau cun la gruppa d'interess e lavur.

Ensemen cul possessur dalla Sala d'art a Trun, Luis Defuns, havein nus entschiet cul project da pilot «Monthly event». Il post da lavur da GIUVENITETGNA CADI vul possibilitar a giuvenils cantaturAs e musicistAs ed ad auters artistAs da tut gener da seprestar ad in publicum. Quei dat la caschun a giuvenils e giuvenils carschi da sentupar e sedivertir en in



local d'ambient da local da notg. Ils 6 da schaner han *Giganto alias Ivo Orlik e Mattiu Defuns* dau concert e battegiu lur disc cumpact cul num «Undas». Cun „Monthly event“ havein continuau cun las suandontas purschidas: ils 4 da mars ha Gabriela presentau il project e silsunter ha *DJ Wolfonics alias Silvan Wolf* mess si musica; igl avrel havein organisau in matsch da pitgar en guotas; ils 13 da matg ha *DJ Devois alias Flavio Deflorin* mess si



musica; ils 14 d'october ha *Chiara Jacomet* presentau siu emprem disc cumpact; ils 4 da november han *Dario Hess e Flavian Krol* concertau; ils 18 da november han *Asa S. Hendry e Leander Albin* presentau lur project „Detta en bucca“. Igl interess e la participaziun da giuvenils ei per part stada gronda ed autras gadas mudesta. Aschia ein ils organisaturs sedecidi da menar vinavon il project mo parzialmein e buc regularmein meinsil.

Sonda, ils 28 da schaner, ei ina grappa giuvenils sentupada sil glatsch a Sedrun per patinar. Silsunter ein els serendi ell'Aua Viva a Mustér ed han gudiu in fondue.



La primavera havein menau atras duront dus dis il cuors da menaders. Ils suandonts tredisch giuvenils han absolviu il cuors da menaders cun Claude Bachmann, dipl. pädagog da religiun e menader dil post per la lavur da baselgia a favur dals giuvenils PBG e Gabriela: *Alissia*



Marino, Cedric Zanin, Dominic Giger, Dominic Huonder, Fabrizio Della Valle, Livia Carigiet, Mattias Candinas, Pirmin Tomaschett, Robin Manetsch, Samuel Wolf, Seamus Venzin, Tiago Macedo e Tizian Giger. Cordiala gratulaziun ed engraziel pigl engaschi.

Adina puspei vegn la damonda davart dils giuvenils da far in'excursiun. Il giavisch dad inaga ir a dar Paintball era gronds. Sonda, ils 10 da zercladur, ein 40 giuvenils e giuvens carschi, ils quals ein stai prompts da prender auto e far taxi, serendi ad Emmen LU ella Paintball-Arena per dar il giug da sittar cun ballins da color.



La vischnaunca Mustér ha organisau la sonda, ils 12 d'uost ina fiasta dil vitg. Culs menaders dil local CONS havein tschentau duas measas ordaviart e mischedau drinks senz'alcohol ed offeriu als visitaders.

Ina gruppa ei era sengaschada da rimar rumians sin plaz da fiasta.

Il club da bigliard 07 da Rabius ha offeriu al local PISTREGN a Surrein ina meisa da bigliard, cordial engraziament. Spontanmein han Willy Decurtins e Giusep Janka menau atras in cuors per emprender co dar bigliard. Menaders dil local PISTREGN e scolars ed era scolaras ein separticipai.

Il project «halla aviarta» che vegn sustenius digl uffeci da sanadad dil cantun Grischun purschin nus gia per la tiarza sesiun. Ils giuvenils san far sport ni dar giugs en la halla da gymnastica a Trun ni Rabius en in turnus da mintgamai duas jamnas.

Robert Candinas, gerau dalla vischnaunca Sumvitg, ei dapi entgins onns commember dalla cumissiun ed ha surpriu il presidi da nossa cumissiun per entschatta 2017. Bien engraziament ad el persuerter. La cumissiun dalla lavur da giuventetgna secumpona dils delegai da mintga vischnaunca dalla Cadi sco suonda: Tujetsch, entschatta 2017 Renato Decurtins silsuerter Mario Hitz; Mustér, Jris Lombris; Medel, entschatta 2017 Esther Koch silsuerter Gabriel Venzin; Sumvitg, Robert Candinas; Trun, Markus Steiner (demissiunau fin 2017); Breil: Pascal Derungs (demissiunau fin 2017).

Cun in sincer engraziel fetg a tuts che sustegnan nus,
per GIUVENTEGNA CADI, Gabriela Cabalzar-Lombriser ed Olivia Pfister-Tgetgel